



Bosnić: Pozivao mladiće u džihad

Tužilaštvo BiH okončalo istragu

# Uskoro optužnica protiv Bosnića i još osam osoba

Neformalni vođa vehabija osumnjičen za vrbovanje na terorističke aktivnosti • Tužilaštvo saslušalo na desetine svjedoka

Tužilaštvo BiH privelo je kraju istragu i kompletiralo optužnicu protiv Bilala Bosnića, neformalnog vođe vehabijske zajednice u BiH, ali i još desetina osoba koje su uhapšene u velikoj akciji Agencije za istrage i zaštitu (SIPA) BiH kodnog naziva „Damask“ prije tri mjeseca, saznaje „Dnevni avaz“ iz izvora bliskih ovoj pravosudnoj instituciji.

## Naredna godina

Saznajemo da je pitanje dana kada će optužnica, koja je već napisana, biti prosljeđena Sudu BiH na potvrđivanje, a kako bi već početkom naredne godine počelo suđenje Bosniću i drugima osumnjičenim za terorističke aktivnosti.

Adil Lozo, Bosnićev advokat, rekao je za naš list da je evidentno da je Tužilaštvo BiH završilo svoj dio posla i da pretpostavlja da je optužnica već gotova stvar.

- Vjerujem da će optužnica uskoro biti prosljeđena Sudu BiH. Šta se drugo moglo očekivati? Svima je jasno da će ovdje biti suđenje, ne samo Bosniću nego i drugima. Koliko je ova optužnica opravdana, vrijeme će pokazati. Ja mislim da nije - kaže Lozo.

Nezvanično saznajemo da bi, osim Bosnića, koji je prvoosumnjičen u ovom predmetu, optužnica trebala obuhvatiti i Avdulaha Hasanovića, Enesa Mešića, Emina Hodžića, Adema Karamuju, Fikreta Hadžića, Envera Lilića, Salku Ima-

movića i Mehmeda Tutića.

Svi su oni uhapšeni u akciji „Damask“, a proveli su u pritvoru nekoliko mjeseci. No, kasnije su svi pušteni da se brane sa slobode, samo je Bosnić ostao u pritvoru. Tužilaštvo će za ove osobe ubrzo tražiti novi pritvor.

## Razbijanje mreže

Višemjesečna istraga Tužilaštva BiH, koja je počela sredinom godine, usmjerena je protiv razbijanja terorističke mreže u BiH, čiji su pripadnici učestvovali na sirijskom ratištu boreći se na strani IS-a. SIPA je protekla tri mjeseca ukupno uhapsila 27 vehabija koji su bili povezani s terorističkim aktivnostima.

M. AŠČIĆ